

## Geestelike Waarhede – Les 7 Matteus 27 – 28

1. Jesus leef. Jesus is nie 'n mens wat in die tronk gegooi en doodgemaak kan word nie. Hy is die ewige God. Hy het geen begin en geen einde nie. God het van die begin van die wêreld af beplan om as mens na die aarde te kom: 'n dienskneg wat sou ly. Dit was Sy wil om op daardie dag en op so 'n manier gekruisig te word. Sy planne kan nie verydel word nie en niemand kan Hom oorwin nie. Hy is steeds, en sal altyd die enigste ware lewende God wees.
2. Die Fariseërs het Jesus soveel geglo, dat hulle soldate gekry het om Sy graf te bewaak na Sy dood omdat Hy gesê het dat Hy sou opstaan. Toe die soldate kom vertel wat gebeur het, het hulle hulle geglo. Hulle het die soldate selfs betaal om om te lieg oor wat gebeur het. Dieselfde leiers was by die dag toe Johannes die Doper Jesus gedoop het en hulle het God se stem uit die hemel hoor sê wie Hy was. Hierdie manne was getuies by talle van die wonderwerke wat Jesus gedoen het. Hulle was baie kwaad vir Hom toe Hy op die Sabbat 'n man met 'n verdorde hand genees het. Hulle het gesien hoe Hy duiwels uitdryf uit mense wat swaar gely het, en hulle het gesien hoe Hy mense se sondes vergewe. Daar was byna niemand wat meer geweet het van Jesus se lewe en boodskap as die Fariseërs nie. Maar hierdie groep mense het nie die liefde wat God vir hulle aangebied het in hulle lewens aanvaar nie. Hulle het hulle nie van hul sondes bekeer nie. Hulle het nie die beheer van hul lewens aan Jesus Christus oorgegee nie. Om 'n verhouding met Jesus Christus te hê, is meer as om die feite in verband met Sy lewe te ken en te glo. Dit is meer as 'n nuwe

godsdienst wat anders is. Jesus begeer dat ons ons sal bekeer van ons sondes, in Hom sal glo, en ons lewens vir Hom sal gee. Hy wil die Here (Leier) van ons lewens wees. Hy wil oor ons regeer, elke dag van ons lewe.

3. Wie is Jesus?
  - Jesus is gebore uit 'n maagd.
  - Jesus het gesê dat Hy God is.
  - Jesus het baie wonderwerke gedoen en die mense vergewe wat hulle bekeer het van hul sondes.
  - Jesus het aan die kruis gesterf om voor 'n regverdige God die prys te betaal vir die sondes in ons lewens.
  - Jesus is opgewek uit die dood en Hy leef vandag!
  - Jesus wil hê ek moet my ook bekeer van my sondes en my lewe vir Hom gee.

Die Bybel leer ons dat Jesus nie gesterf het om 'n voorbeeld te word nie. Hy het gesterf as Plaasvervanger vir my en jou wat dit verdien om voor God te staan te kom vir al die verkeerdhede wat ons in ons lewens doen.

**Die Bybel sê: “want elkeen wat die Naam van die Here aanroep, sal gered word.” Romeine 10:13.**

- ❖ Dit beteken dat ek, ongeag my verlede, vir Jesus in my lewe kan innooi en Hy sal al my sondes vergewe en in my woon.
- ❖ Dit beteken dat al my sondes van die verlede, hede en toekoms KLAAR voor God vergewe is die oomblik dat Jesus in my hart inkom. Dit is nie as gevolg van enigiets wat ek gedoen het nie. Dit is nie omdat ek 'n goeie godsdienst gekies het nie. Dit is nie omdat ek goeie morele standaarde het nie. Dit is nie omdat my ouers van 'n spesifieke ras of sosiale klas is nie. Dit is SLEGS omdat ek die offer aangeneem het wat Jesus gebring het toe Hy aan die kruis gesterf het.

- ❖ Dit beteken dat ek van hierdie oomblik af weer rein is in God se oë; onskuldig. Die Bybel leer dat die loon van die sonde die dood is, maar Christus se dood is genoeg om my 'n nuwe skepsel te maak – as ek kies om Hom te volg!

As jy God se vergifnis *nou* in jou lewe wil hê en 'n volgeling van Christus wil word, kan jy Hom nou in jou lewe innooi. Dit is nie nodig om in 'n kerk te wees nie. Dit is nie nodig om enige spesiale woorde te sê nie. Al wat belangrik is, is dat jy na God toe sal kom en bely dat jy glo dat Jesus God is en dat jy wil hê Hy moet die Here (Beheer) van jou lewe wees.

Bid 'n gebed soos:

“Here, ek weet dat ek 'n sondaar is. Ek glo dat Jesus aan die kruis gesterf en uit die dood opgestaan het om my te red van sonde. Ek wil my bekeer van my sondes. Kom in my lewe in en vergewe al my sondes. Ek gee my lewe vir U. Dankie dat U my liefhet. In die Naam van Jesus. Amen.”

4. “En onthou: Ek is by julle al die dae tot die voleinding van die wêreld.”

Die Bybel sê in Johannes 14:2-3: “<sup>2</sup>In die huis van my Vader is daar baie woonplek. As dit nie so was nie, sou Ek nie vir julle gesê het Ek gaan om vir julle plek gereed te maak nie. <sup>3</sup>En as Ek gegaan het en vir julle plek gereed gemaak het, kom Ek terug en sal julle na My toe neem, sodat julle ook kan wees waar Ek is.”

Jesus belowe ons dat ELKEEN wat sy/haar lewe vir Hom gee die ewigheid saam met Hom sal deurbring in 'n plek genaamd hemel. Die hemel is die Vader se huis. As ons Jesus in ons harte ingenooi het, sal ons die ewigheid by Jesus deurbring. Dit beteken dat Jesus

by ons sal wees hier op aarde, maar wanneer ons sterf, sal ons die ewigheid by Hom deurbring in die hemel.

Die liefde wat Jesus vir ons het, is waarlik vir ewig!

**BEGIN 'N NUWE LEWE IN CHRISTUS**  
GEBASEER OP DIE BOEK VAN MATTEUS

**Die Verhaal van Jesus Christus se Lewe**  
**deur**  
**Christy A. Brawner**

**Pionier Evangelisasie Reeks**

## BEGIN 'N NUWE LEWE IN CHRISTUS

Deur  
Christy A. Brawner

\* As dit moontlik is, laat elke groepslid wat kan skryf 'n skoon notaboekie en 'n pen saambring vir hierdie studie.

### “Jesus se Eerste en Tweede Koms” – Les 1 Matteus 1 en 24

**“<sup>42</sup>Bly dus waaksaam, omdat julle nie weet watter dag julle Here kom nie. <sup>44</sup>Om dieselfde rede moet julle ook altyd gereed wees, want die Seun van die mens kom op 'n uur dat julle dit nie verwag nie.”**

**Matteus 24:42 en 44**

Gedurende die tyd toe die Romeine oor die bekende wêreld regeer het, was daar 'n jong maagd in die land van Israel met die naam Maria. Sy was verloof aan Josef. Maria het swanger geraak voor hulle getroud is en toe Josef dit uitvind, wou hy die verlowing verbreek. Hy het een aand besluit dat hy dit in die geheim sou doen sodat hy Maria nie in die openbaar tot skande sou maak nie.

Terwyl hy hieroor gedink het, het 'n engel van die Here in 'n droom vir hom gesê om met Maria te trou, aangesien sy nie ontrou was aan hom nie, maar deur die werking van die Heilige Gees swanger geraak het. Die engel het verder vir hom gesê dat Maria 'n Kind in die wêreld sou bring wat deur die Joodse profete van ouds belowe is. Die profeet Jesaja het na hiêrdie Kind verwys toe hy gesê het: “'n Jong vrou sal swanger word en 'n seun in die wêreld bring en sy sal hom Immanuel noem.”

Josef het die engel geglo en met Maria getrou. Hy het egter nie met haar gemeenskap gehad voor Jesus van die maagd gebore is nie. Josef het die Seun Jesus genoem.

*Daar is baie profesieë in die Bybel oor Jesus se koms. Sy geboorte sowel as die gebeure rondom Sy dood en opstanding is in die Ou Testament voorspel. Jesus het Self baie beloftes gemaak oor wie Hy is en wat Hy sou doen. Sommige van Jesus se beloftes asook profesieë in die Ou Testament het nog nie gebeur nie. Hierdie profesieë sê dat Jesus weer na die aarde sal kom. Die Christus se eerste koms was na 'n nederige plek, want Hy het as die Lydende Dienskneg gekom. Die Bybel leer egter dat Sy Tweede koms (wederkoms) baie anders sal wees.*

Toe Jesus Sy volgelinge op die Olyfberg geleer het, het Hy van Sy wederkoms gepraat. Dit het Hy gedoen as antwoord op die vraag: “Sê vir ons, wanneer sal hierdie dinge gebeur en wat sal die teken van u koms en van die einde van hierdie wêreld wees?”

Jesus het hulle eers versigtig geantwoord. Hy het gesê hulle moet versigtig wees dat niemand hulle mislei nie. Hoe nader Sy wederkoms is, hoe meer mense sal kom en sê: “Ek is die Christus.” Ongelukkig sal hulle deur baie mense geglo word. Verder sal daar in hierdie tyd baie oorloë wees onder die volkere van die aarde. Daar sal vier verskillende rampe wees: onrus en gerugte van oorlog, hongersnood, siektes en aardbewings. Dit is egter maar net die begin, want daar sal meer smarte kom voor die einde daar is.

Mense sal mekaar verraai, hulle sal mekaar doodmaak en mekaar haat omdat hulle in Jesus glo. Baie vals profete sal die mense verlei. Wetteloosheid sal toeneem en mense se liefde vir mekaar sal afkoel. Maar deur dit alles sal die Goeie Nuus van Christus aanhou versprei tot al die volke van Christus gehoor het, en dan sal die einde kom.

Daar sal groot vervolging wees dwarsoor die wêreld. As God die mens toelaat om voort te gaan net soos hy wil, sal ons onself gou vernietig. Maar God sal die tyd van die groot verdrukking inkort ter wille van Christus se volgelinge.

Moet dus nie die vals profete en die vals Christusse glo wat rondgaan en groot tekens en wonders doen nie. Hulle probeer net om mense te mislei; as dit moontlik was, sou hulle selfs dié probeer mislei wat hul lewens vir Christus gegee het.

Die koms van die Seun van die mens sal eendag kom soos 'n weerligstraal wat in die Ooste uitslaan en die lug tot in die Weste verlig. Na die vervolging sal die son verduister en die maan sal nie sy lig gee nie. Die sterre sal uit die ruimte val en die kragte van die hemelruim sal ontwig word. DAN sal die teken van die Seun van die mens in die hemelruim verskyn, en DAN sal al die volke van die aarde verslae wees. Hulle sal die Seun van die mens op die wolke sien kom met groot krag en majesteit. Hy sal Sy engele met die geklank van die groot trompet uitstuur om al die mense wat hul lewens vir Jesus Christus gegee het, bymekaar te maak uit die vier windstreke van die aarde.

Wanneer al hierdie dinge gaan gebeur, weet niemand nie. Die engele in die hemel weet nie eens wanneer Jesus weer kom nie. Nét die Vader weet wanneer Jesus Christus weer sal terugkeer na die aarde.

“Om dieselfde rede moet julle ook altyd gereed wees, want die Seun van die mens kom op 'n uur dat julle dit nie verwag nie.”

### Mondelinge Vrae

1. In watter land is Jesus gebore?
2. Wat is die name van Jesus se aardse ouers?
3. Wat was so wonderlik in verband met Jesus se eerste koms na die aarde?

4. Die profeet Jesaja het geprofeteer dat Jesus uit 'n maagd gebore sou word en dat Hy Immanuel genoem sou word; dit beteken “\_\_\_\_\_.”
5. Jesus was saam met Sy dissipels op die Olyfberg. Watter vraag het hulle Hom gevra?
6. Jesus het hulle gewaarsku om versigtig te wees dat hulle nie deur \_\_\_\_\_ mense mislei word nie.
7. Hy het gesê baie mense sal daarop aanspraak maak dat hulle die \_\_\_\_\_ is.
8. Jesus het vier rampe voorspel wat oor die hele aarde sal kom voor Hy weer kom. Noem hulle. O \_\_\_\_\_, H \_\_\_\_\_, S \_\_\_\_\_ en A \_\_\_\_\_.
9. Jesus se volgelinge sal swaarkry omdat hulle in Christus glo. Noem sommige van die dinge wat mense volgens Jesus aan mekaar sal doen.
10. Jesus het gesê dat die vals profete krag sal hê om \_\_\_\_\_ te doen sodat hulle selfs die volgelinge van Jesus sou kon verlei as die moontlik was.
11. Met watter natuurverskynsel vergelyk Jesus Sy wederkoms?
12. Wat gaan gebeur met die son, die maan en die sterre wanneer Jesus weer kom?
13. Op watter instrument sal die engele blaas terwyl hulle Christus se volgelinge bymekaar maak?
14. Waar sal God se kinders saamkom?
15. Wie is die enigste Een wat weet wanneer Jesus weer sal kom?
16. Hoe met ek optree as iemand wonderwerke doen wat nie in Jesus se Naam is nie, of as iemand sê dat hy die Christus is?

## Geestelike Waarhede – Les 1 Matteus 1 en 24

1. Soos Jesus die eerste keer gekom het om profesieë te vervul, sal Hy weer kom met krag en majesteit. Daar is baie vals godsdienste, baie vals profete, en baie mense wat sê dat hulle God is. As Jesus weer kom, sal daar geen twyfel wees oor wie Hy is nie. Die Bybel sê dat elke knie sal buig en elke tong bely dat Jesus die Here is. Enigeen wat na ons toe kom en sê dat hy 'n nuwe profeet of 'n Christus of 'n god is, is 'n vals profeet en 'n namaaksel.
2. Hy sal al Sy kinders bymekaar maak uit die vier windstreke, van elke uithoek van die aarde af.
  - ⊞ Jesus het belowe dat Hy sou kom, en Hy het. Hy belowe om weer te kom, en Hy sal. Hy belowe om AL Sy kinders bymekaar te maak en Hy sal.
  - ⊞ As ons Jesus in ons lewens innooi wanneer ons ons harte vir Hom gee, belowe Hy dat Hy ons nooit sal begewe of verlaat nie. Dit beteken dat God, al doen ons sonde (en ons sal), getrou is om Sy belofte aan ons te hou. Dit maak nie saak wát met ons gebeur, of wat ons doen nie, as ons ons lewens vir Jesus gegee het, sal Hy ons met Hom saamneem hemel toe; wanneer Hy weer kom, sal ons Hom tegemoet gaan in die wolke.
3. God se volk sal ly omdat hulle Hom volg.

Die Bybel leer ons dat mense boser en boser sal word namate die einde naderkom. Hulle sal meer haat, meer moor en mekaar meer verraai. Die Bybel sê dat baie mense Jesus se volgelinge sal haat en sleg behandel. Dalk het jy al ondervind dat mense jou anders behandel omdat jy besluit het om Jesus te volg. Hoe het mense se

gesindheid teenoor jou verander vandat jy Jesus in jou lewe ingenooi het? Het party mense (dalk goeie vriende of familie) jou vriendskap verraai omdat jy besluit het om Christus te volg?

Die Bybel leer ons dat ons sulke mense moet liefhê (Matteus 5:43-48). Ons moet die mense liefhê wat ons haat en seermaak. Ons moet hulle liefhê en vir hulle bid. Dit is hoe Jesus diegene behandel het wat Hom seergemaak en verraai het. En om 'n volgeling van Christus te wees, is om Sy voorbeeld van liefde na te volg. Die Bybel leer ook dat diegene wat ly en vervolgd word omdat hulle Christus volg, spesiale seën sal ervaar; trouens, die Bybel sê dat ons dit louter vreugde moet ag, want eendag sal dit die prys wat ons betaal het waardig wees.

- Kom ons sluit hierdie byeenkoms af in gebed. Laat elkeen die dinge wat met hulle gebeur het vandat hulle Christus aangeneem het, met mekaar deel. Hopelik is dit 'n mooi verhaal; dalk nie. Is daar enigiemand wat gely het sedert hy Christus aangeneem het? Onthou om as 'n groep vir so 'n persoon te bid.
- Voor ons bid, moet elkeen sy notaboekie of 'n skoon vel papier en 'n pen uithaal. As jy 'n notaboekie het, skryf die naam van elke groepslid bo-aan 'n skoon bladsy. So kan ons elkeen se gebedsversoeke by sy naam neerskryf. Kom ons onthou elkeen se gebedsversoeke. Laat ons ook 'n lys maak van mense wat Christus nog moet aanneem. Deel die lys met mekaar sodat ons kan saamstaan in die stryd vir ons vriende en geliefdes.
- Laat ons belowe om hierdie week elke dag vir mekaar te bid. Hou hierdie lysie met name in jou kamer en neem dit en bid vir mekaar voor julle gaan slaap of wanneer jy opstaan.

- Kom ons sluit ons byeenkoms af deur God te dank omdat Hy getrou is en Sy beloftes hou. Dank Hom dat Hy reeds aarde toe gekom het om ons van ons sondes te red, en vir die belofte van Sy Wederkoms. Kom ons vra Hom om ons te help om getrou te wees in ons gebede vir mekaar elke dag van die week wat voorlê.

## BEGIN 'N NUWE LEWE IN CHRISTUS

deur  
Christy A. Brawner

### **“Jesus se vlug na Egipte en Sy Doop” – Les 2** **Matteus 2-3**

**“<sup>16</sup>Jesus is toe gedoop en het dadelik daarna uit die water gekom. Meteens het die hemel bokant Hom oopgegaan, en Hy het die Gees van God soos 'n duif sien neerdaal en op Hom kom. <sup>17</sup>Daar was ook 'n stem uit die hemel wat gesê het: ‘Dit is my geliefde Seun. Oor Hom verheug Ek My.’”**      **Matteus 3:16-17**

#### Hersiening

1. Die naam van Jesus se moeder was \_\_\_\_\_.
2. Die profeet Jesaja het gesê dat Jesus Immanuel genoem sou word, dit word vertaal “God \_\_\_\_\_.”
3. Toe Jesus se dissipels Hom op die Olyfberg vra oor Sy wederkoms, het Hy vir hulle gesê om versigtig te wees dat hulle nie mislei word deur \_\_\_\_\_ nie.
4. Jesus het gesê daar sou baie mense kom wat daarop aanspraak maak dat hulle die \_\_\_\_\_ is.
5. Jesus het gesê dat daar rampe oor die hele aarde sou kom, soos O \_\_\_\_\_, H \_\_\_\_\_, S \_\_\_\_\_ en A \_\_\_\_\_.
6. Jesus het gesê dat volgelinge van Christus ook sou ly. Hoekom?

7. Soos watter gebeurtenis sal Sy wederkoms wees volgens Jesus self?

---

8. Waar sal die engele God se kinders bymekaar maak?

---

9. Wie is die enigste Een wat weet wanneer Jesus Christus se wederkoms sal wees?

---

10. Hoe moet ek optree wanneer iemand wondertekens doen wat nie in Jesus se Naam gedoen word nie, of sê hy is die Christus?

---

11. Ek moet myself \_\_\_\_\_ ag wanneer iemand met my spot ter wille van Christus.

---

12. Ek moet hulle wat my sleg behandel omdat ek aan Christus behoort met \_\_\_\_\_ behandel.

Jesus is in Betlehem gebore en het daar gewoon totdat sekere wyse manne uit die Ooste Hom besoek het. Hierdie manne het na Israel gekom agter 'n helder ster aan. Toe hulle in die provinsie Judea kom, het hulle eers na die hoofstad, Jerusalem, gegaan. Daar het hulle na koning Herodus toe gegaan om hom te vra waar die nuwe Koning van Israel gebore is, want hulle het Sy ster gesien.

Herodus, en saam met hom die hele Jerusalem, was onsteld toe hulle hiervan hoor. Hy het toe in die geheim vergadering gehou met die godsdienstige leiers. Hy het hulle uitgevra oor waar die Christus gebore sou word. Hulle het vir hom gesê dat die profete geskryf het dat die Kind in Betlehem gebore sou word.

Herodus het vir die wyse manne gesê om na Betlehem te gaan. Voor hulle egter sy paleis verlaat het, het hy hulle uitgevra oor die presiese tyd waarop hulle die ster die eerste keer gesien het. Dit het hy gedoen sodat hy die kind se ouderdom kon uitwerk.

Die wyse manne het hul reis na Betlehem voortgesit. Die ster het hulle gelei tot by die huis waar Jesus gebly het. Hulle het die huis binnegegaan en Hom aanbid. Hulle het vir Hom ook baie kosbare geskenke gegee: goud, wierook en mirre. Voor hulle egter hulle terugreis kon aanpak, het God hulle in 'n droom gewaarsku om met 'n ander pad terug te keer huis toe en nie terug te gaan na Jerusalem soos Herodus gevra het nie.

Josef het ook 'n droom gehad waarin 'n engel van die Here hom gewaarsku het om Maria en die Kind te neem en na Egipte te vlug. Daar moes hulle bly totdat die Here weer met hom praat. Die Here het vir hom laat weet dat Herodus die Kind sou probeer doodmaak. Dit moes gebeur sodat vervul sou word wat deur die profeet in die Ou Testament voorspel is: "Uit Egipte het Ek my Seun geroep."

Herodus het inderdaad daarop uitgegaan om die beloofde Kind te vermoor. Hy het alle seuntjies van twee jaar en jonger in en om Betlehem, laat doodmaak.

Na Herodus se dood het 'n engel van die Here in 'n droom aan Josef verskyn en vir hom gesê om terug te keer na Israel. Josef het God gehoorsaam. Hy het met sy gesin in Galilea, 'n provinsie Noord van Judea, gaan woon in 'n dorpie met die naam Nasaret.

In daardie tyd was daar 'n man met die naam Johannes die Doper wat in die woestyn van Judea gepreek het. Die boodskap wat hy gepreek het, was: "Bekeer julle, want die koninkryk van die hemel het naby gekom."

Johannes het klere gedra van kameelhaar met 'n leerband om sy heupe. Sy voedsel was sprinkane en veldheuning.

Jerusalem en die hele Judea en die hele omgewing van die Jordaan het na hom gaan luister. Hulle het hulle sondes bely en hulle in die Jordaanrivier laat doop. Baie van die Fariseërs en die Sadduseërs het ook gegaan om na hom te luister. Johannes het hulle "slange" genoem ("addergeslag") omdat hulle staatgemaak het op

hulle tradisie om hulle te red en nie geglo het dat hulle hulle moes bekeer nie.

Terwyl Johannes die Doper gepreek het, het hy gepraat van een wat sou kom en wat met die Heilige Gees en vuur sou doop. Hy het gesê dat Hy die mense sou skei en dat Hy diegene wat in Hom glo, na Hom toe sou neem. Die res sou Hy laat verbrand met 'n onblusbare vuur.

Jesus het toe uit Galilea na Johannes toe gekom by die Jordaan om deur hom gedoop te word. Johannes wou eers nie gehoor gee aan Sy versoek nie, want hy het gesê dat hy onwaardig was. Jesus het egter daarop aangedring om gedoop te word omdat Hy so aan God se wil wou voldoen.

Nadat Jesus gedoop is, het Hy onmiddellik uit die water opgeklim. Almal kon sien dat die hemel bokant Hom oopgaan. Die Heilige Gees het soos 'n duif op Hom neergedaal en 'n stem het uit die hemel gekom: "Dit is my geliefde Seun. Oor Hom verheug Ek My."

### **Mondelinge Vrae**

1. Watter soort mans het Jesus kom besoek in Betlehem en watter geskenke het hulle vir Hom gebring?
2. Waar het die mans eers aangegaan om navraag te doen en met wie het hulle gepraat?
3. Hoekom het die Here Josef gewaarsku om na Egipte te vlug?
4. Waarheen het Josef met sy gesin gegaan na Herodus se dood?
5. Waar het Johannes die Doper gepreek?
6. Hoe het hy gelyk?
7. Watter boodskap het hy gebring?
8. Wat het met die mense gebeur wat hulle sondes bely het?
9. Hoekom het Johannes die Doper die Fariseërs en die Sadduseërs "slange" ("Addergeslag") genoem?

10. Johannes het gepraat van Een wat sou kom wat groter was as hy. Hy het geleer dat die Een die mense van die wêreld sou skei. Hoe so?
11. Wie het uit Galilea gekom om deur Johannes gedoop te word?
12. Jesus het daarop aangedring dat Johannes Hom doop, al het hy onwaardig gevoel. Watter rede het Jesus aangevoer?
13. Wat het gebeur toe Jesus uit die water uit opkom?

## Geestelike Waarhede – Les 2

### Matteus 2-3

1. Ons kan slegs God se beste vir ons lewens ervaar as ons Hom volkome gehoorsaam is. Josef het baie dinge gedoen slegs omdat God hom beveel het. Hy het God gehoorsaam en met Maria getrou, selfs al was sy swanger. Alhoewel haar swangerskap iets was wat hy glad nie kon verstaan nie, het hy God vertrou. En toe, terwyl hulle in Betlehem woon, beveel God hom om met sy gesin na Egipte te trek. Egipte was 'n land met 'n vreemde taal. Hulle lewenstyl was vreemd en hulle het afgode aanbid. Hierdie trek was nie maklik vir 'n man met 'n vrou en 'n klein kindjie nie. Tog het hy gekies om te luister. Die gevolg was dat Jesus se lewe gespaar is.

Net soos God 'n spesiale plan met Josef se lewe gehad het, het Hy 'n spesiale plan met elkeen van ons. Die Bybel sê dat Hy ons geken het en 'n spesiale plan vir ons gehad het selfs toe ons nog in die baarmoeder was. As ons God se beste vir ons lewens en ons kinders se lewens wil ervaar, moet ons Sy opdragte baie noukeurig uitvoer. Die Bybel sê God begeer om tot elkeen van ons te spreek in ons harte wanneer ons bid en Sy Woord lees. Hy wil ons lei na 'n vol, oorvloedige lewe by Hom. God praat baie keer direk met ons oor spesifieke situasies, spesifieke gesindhede en spesifieke besluite wat ons behoort te maak. Ons behoort al 'n keuse te maak lank voor ons eers 'n keuse het. Dan sal ons, soos Josef, wanneer die keuse kom, kies om God te gehoorsaam, selfs al is die omstandighede moeilik.

\*Is God besig om met jou te praat oor 'n spesifieke saak in jou lewe? Vra Hy jou om iets in jou lewe te verander wat moeilik is? As dit so is, deel dit gerus met die groep as jy lus het. Elkeen moet dan jou behoefte op hul gebedslys neerskryf sodat hulle deur die komende

week vir jou kan bid. God begeer jou gehoorsaamheid en Hy sal jou die krag gee om Sy planne vir jou lewe te gehoorsaam.

2. Net voordat Jesus na Sy opstanding opgevaar het na die hemel, het Hy vir ons, Sy volgelinge, 'n opdrag gegee. Kom ons kyk weer daarna: “Gaan dan na al die nasies toe en maak die mense my dissipels: doop hulle in die Naam van die Vader en die Seun en die Heilige Gees, en leer hulle om alles te onderhou wat Ek julle beveel het. En onthou: Ek is by julle al die dae tot die voleinding van die wêreld.” Ons sal later in hierdie studie leer hoe om te gaan en ander te vertel van Jesus. Daar is egter een opdrag wat ons self moet nakom in gehoorsaamheid aan Sy Woord. Ons moet gedoop word in die Naam van die Vader, die Seun en die Heilige Gees.

- ⊗ Die doop is 'n eenvoudige daad van gehoorsaamheid aan die voorbeeld wat Christus vir ons nagelaat het. Dit is om saam met 'n gelowige die water in te gaan, jousef vir 'n oomblik onder die water te laat ingaan en dan weer uit te kom.
- ⊗ Jesus is nie as 'n baba gedoop nie. In die Lukasevangelie lees ons dat Jesus as baba tempel toe geneem is. Daar het die priester Hom en sy ouers geseën. Dit was egter geen doop nie!
- ⊗ Sy doop was uit eie keuse. Sy ouers het dit nie namens Hom gedoen nie. Ons behoort almal na aanleiding van Christus se voorbeeld te gaan om gedoop te word deur 'n godvresende persoon.
- ⊗ Dit is nie 'n godsdienstige ritueel wat jou aan 'n bepaalde sekte of denominasie verbind nie. Dit is geen geestelike oefening wat jou siel reinig van sonde nie. Dit is 'n simbool, 'n openbare belydenis van jou keuse om Christus te volg. Die Bybel leer dat die doop 'n beeld is van die

begraving en opstanding van Christus. Wanneer ons gedoop word, identifiseer ons met die begraving en opstanding van Jesus.

\*Wat dink jy van die Doop? Dink jy dit is moeilik om gedoop te word na aanleiding van Christus se voorbeeld? Moet jy gedoop word? Wil jy gedoop word?

## BEGIN 'N NUWE LEWE IN CHRISTUS

Deur  
Christy A. Brawner

### “Die Versoeking van Christus” – Les 3 Matteus 4

**“’n Mens leef nie net van brood nie maar van elke woord  
wat uit die mond van God kom.”      Mat teus 4:4<sup>b</sup>**

#### Hersiening:

1. Die profeet Jesaja het gesê Jesus sal Immanuel genoem word, dit is “God \_\_\_\_\_.”
2. Jesus het gesê dat Sy wederkoms sal wees soos ’n \_\_\_\_\_.
3. Jesus het gesê by Sy wederkoms sal daar geen onsekerheid wees of Hy die ware Christus is nie, want elkeen sal Hom met krag en majesteit sien kom op die \_\_\_\_\_.
4. Jesus het gesê dat baie mense groot wonderwerke doen en voorgee dat hulle die Christus is. Ons moet versigtig wees om nie deur hierdie vals profete \_\_\_\_\_ te word nie.
5. Jesus het gesê ons moet onself \_\_\_\_\_ ag wanneer mense ons seermaak ter wille van Jesus Christus, want ons sal nie ons beloning verloor nie. Hy het gesê ons moet hierdie mense met \_\_\_\_\_ behandel.
6. Jesus het gesê die enigste Een wat die uur van Sy wederkoms ken, is die \_\_\_\_\_.

7. 'n Man met die naam \_\_\_\_\_ die \_\_\_\_\_ het in die woestyn 'n boodskap van bekering gepreek. Hy het klere van kameelhare gedra en veldheuning geëet.
8. Baie het gekom om deur Johannes gedoop te word en het hulle \_\_\_\_\_ bely.
9. Johannes het gesê dat daar Een kom wat die mense op die aarde sou skei, en dat dié wat Hom verwerp, verdoem is tot 'n ewige, onblusbare \_\_\_\_\_.
10. Jesus het Johannes kom vra om Hom te \_\_\_\_\_.
11. By Jesus se doop het die \_\_\_\_\_ soos 'n duif neergedaal en \_\_\_\_\_ het uit die hemel gepraat.
12. Jesus se laaste opdrag aan Sy dissipels voor Hy opgevaar het na die hemel, was om almal wat Christus aangeneem het as Here te \_\_\_\_\_.
13. Ons moet \_\_\_\_\_ word, nie omdat dit ons \_\_\_\_\_ van sonde nie, maar omdat dit 'n simbool is wat ons met \_\_\_\_\_ identifiseer.
14. Die doop simboliseer die \_\_\_\_\_, \_\_\_\_\_ en \_\_\_\_\_ van Jesus.

Na Sy doop het die Heilige Gees Jesus weggevoer na die woestyn toe waar Hy deur die duiwel versoek sou word. Hy het vir veertig dae en veertig nagte daar gebly en gevas. Nadat die veertig dae verby was, was Hy baie honger. Toe het die duiwel na Hom gekom en gesê: “As U die Seun van God is, sê hierdie klippe moet brood word.” Jesus het hom uit die Ou Testament geantwoord: “Daar staan geskrywe: 'n mens leef nie net van brood nie, maar van elke woord wat uit die mond van God kom.”

Hierna het die duiwel Jesus in Jerusalem, die hoofstad, ingeneem na die hoogste punt van die tempel. Hier het hy vir Hom gesê: “As

U die Seun van God is, spring af! Daar staan mos geskrywe: Hy sal sy engele oor jou opdrag gee en: Op hulle hande sal hulle jou dra, sodat jy jou voet nie teen 'n klip sal stamp nie.” Jesus het weer die Woord van God aangehaal: “Jy mag die Here jou God nie op die proef stel nie.”

Die duiwel het Hom weer weggevoer, na 'n baie hoë berg toe. Van hier af kon hulle al die koninkryk van die wêreld met hulle prag sien. Satan het vir Jesus gesê: “Dit alles sal ek vir u gee as U neerval en my aanbid.” Maar Jesus het vir hom gesê: “Gaan weg, Satan, want daar staan geskrywe: “Die Here jou God moet jy aanbid en Hom alleen dien.” Die duiwel het na Jesus geluister en weggegaan. Toe het daar engele gekom en Jesus versorg.

### Mondelinge Vrae

1. Waarheen het die Heilige Gees Jesus geneem om versoek te word?
2. Wat het Jesus vir veertig dae gedoen voordat Satan gekom het om Hom te versoek?
3. Satan het Jesus in die eerste twee versoekings uitgedaag om te bewys dat Hy \_\_\_\_\_ is.
4. Wat wou Satan met die eerste versoeking hê, moes Jesus met die klippe doen?
5. Hoe het Jesus die eerste versoeking weerstaan?
6. Wat wou Satan hê Jesus moes doen toe hulle op die hoogste punt van die tempel was?
7. Hoe het Jesus hierdie versoeking weerstaan?
8. Met die derde versoeking het Satan belowe om al die koninkryk van die wêreld vir Jesus te gee as Hy meer as net een ding sou doen. Wat moes Jesus doen?
9. Hoe het Jesus Satan weerstaan tydens die derde versoeking?
10. Wie het Jesus kom versorg nadat Hy die duiwel weggestuur het?

## Geestelike Waarhede – Les 3

### Matteus 4

1. Ons sal versoek word nadat ons ons lewens vir Christus gegee het. Anders as Christus hoef ons nie in die woestyn in te gaan om daar versoek te word nie. Die Bybel leer dat ons nie net deur die duiwel nie, maar ook deur ons eie begeertes versoek word (Jakobus 1:14). Die Bybel leer ons ook dat daar 'n voortdurende stryd in ons harte is tussen ons begeerte om goed te doen en die begeerte om sleg te doen. <sup>15</sup>“Ek begryp self nie wat ek doen nie, want wat ek wil doen, dit doen ek nie, maar wat ek haat, juis dit doen ek.” <sup>19</sup>Die goeie wat ek wil doen, doen ek nie, maar die slegte wat ek nie wil doen nie, dit doen ek.” Romeine 7:15&19
2. Jy sal versoek word omdat jy nou twee nature in jou het. Die een is die vlees en die ander een die Gees (die Heilige Gees) in jou. Galasiërs 5:16-17 sê: <sup>16</sup>“Wat ek bedoel, is dit: Laat julle lewe steeds deur die Gees van God beheers word, dan sal julle nooit swig voor begeertes van julle sondige natuur nie. <sup>17</sup>Wat ons sondige natuur begeer, is in stryd met wat die Gees wil, en wat die Gees wil, is in stryd met wat ons sondige natuur begeer. Hierdie twee staan lynreg teenoor mekaar, en daarom kan julle nie doen wat julle graag wil nie.” Daar sal daagliks stryd wees tussen jôu en die wil van God in groot sowel as klein dingetjies in die lewe.
3. Ons kan versoeking op dieselfde wyse as Jesus weerstaan: deur die krag van die Woord van God. “Die woord van God is lewend en kragtig. Dit is skerper as enige swaard met twee snykante en dring deur selfs tot die skeiding van siel en gees en van gewigte en murg. Dit beoordeel die bedoelings en gedagtes van die hart.” Hebreërs 4:12. *Lees hierdie vers meer as een keer. Vra die groepslede wat hulle dink die vers beteken.*

God se Woord is nie net 'n boek vol raad nie. Dit is die lewende Woord wat God gebruik om op 'n unieke manier tot elke hart te spreek. Dit dring diep in dié deel van ons harte in waarvan God alleen weet

Die enkele belangrikste ding wat elke volgeling van Christus MOET doen, is om ELKE DAG tyd alleen met die Vader deur te bring. Satan sal alles in sy vermoë doen om jou weg te hou van die Woord van God, want hy weet dat God se Woord ons Bron van krag is. Hy sal ons oortuig dat ons te besig is; ons doen reeds Bybelstudie; ons is te vaak; die Bybel is te moeilik om te verstaan en miljoene ander verskonings. Ons moet hierdie idees raaksien vir wat hulle is: LEUENS. Ons moet dit ons prioriteit maak om ELKE DAG tyd deur te bring in gebed en met die Woord van God.

Hier is 'n maklike plan om te volg:

1. Begin jou tyd met die Vader deur vir Hom te sê hoe lief jy Hom het en loof Hom, omdat Hy so wonderlik is.
  2. Dank Hom vir dinge wat Hy vir jou gedoen het, of vir antwoorde op gebed.
- \* Dit is 'n goeie idee om 'n afdeling in jou gebedsboekie te maak genaamd “Dankie”. Skryf die dinge wat God in jou lewe doen hier neer en skryf altyd die datum ook neer. Dit is 'n manier om rekord te hou van hoe God in jou lewe werk.
3. Bid vir ander: die mense in jou Bybelstudiegroep, jou gesin, jou vriende – veral dié wat Christus nog nie ken nie – en spesiale behoeftes. As daar baie mense is vir wie jy wil bid, mag dit nodig wees dat jy elke dag van die week vir 'n paar van hulle bid.

Byvoorbeeld:

<u>Maandag</u>	<u>Dinsdag</u>
Tannie Marie	Ouma
Oom Eddie	Mamma
Rachel	Pappa
Dawid	Ds. Kallie

\*Dit sal dalk help om die groep nou so 'n lys te laat maak, dan kan elkeen sy gebedstyd begin sonder om dit later te doen.

4. Lees en dink na oor God se Woord. Die Bybel leer ons dat ons nie net die Bybel moet lees soos ons ander leesstof lees nie, maar dat ons daarvoor moet NADINK. Dit beteken dat ons:

- ♥ dit stadig moet lees.
- ♥ dit 'n paar keer moet lees en moet dink oor wat die woorde beteken. Dit mag nodig wees om dit 'n paar keer te lees voor ons kan konsentreer op die waarheid wat die Here vir ons wil leer.
- ♥ ons eie naam in die waarheid van die Woord moet inlees waar dit van toepassing is. As die vers byvoorbeeld lees: "Eer jou vader en jou moeder" sal ek lees: "Christy, jy moet jou vader en jou moeder eer."
- ♥ hierdie vers moet terugbid tot die Here en Hom moet dank vir Sy seëninge. Vra Hom in verband met spesiale behoeftes. Byvoorbeeld: "Dankie, Here, vir my pa en ma. Dankie dat U my hemelse Vader is wat in al my behoeftes voorsien en wat dáár is, selfs wanneer my aardse vader nie daar is nie."

Die Bybel bevat baie geestelike waarhede oor ons huidige lewe wat God aan ons wil oordra. Hier is 'n voorbeeld van hoe om God se Woord te oordink.

\*Kom ons begin met die hoostuk na die een wat ons vandag bespreek het, Matteus 5. *Kom ons stop sodat elkeen tyd het om die eerste drie- vier verse kan lees. As iemand nie kan lees nie, moet die leier die verse 'n paar maal vir hom lees sonder enige verduidelikings.*

\*Kom ons probeer nou elkeen om te verstaan wat die verse beteken. As jy verstaan, lees jou naam in die verse in. Moenie bang wees om God se Gees toe te laat om met jou te praat nie. Hier is 'n voorbeeld, maar beslis nie die enigste manier waarop hierdie vers op iemand se lewe toegepas kan word nie. Hierdie woorde het die Here met my gepraat toe ek die verse gelees het.

Vers 3: "Geseënd is dié wat weet hoe afhanklik hulle van God is, want aan hulle behoort die koninkryk van die hemel."

(Geestelike waarheid van skrywer). Ek is geseënd as ek arm van gees is, want ek sal die Koninkryk van God verkry. Here, help my om nederig te wees. Ek wil nie hoogmoedig wees nie, of vol trots of vol van myself nie. Dankie vir die werk wat U in my lewe doen. Dankie dat ek weet dat ek die koninkryk van God sal verkry. Ek is waarlik geseënd.

Vers 4: "Geseënd is dié wat treur, want hulle sal vertroos word.

(Geestelike waarheid van skrywer). Dit is vir my moeilik om my in te dink dat ek geseënd kan wees as ek treur, want dit is so hartseer om te treur. Maar as volgeling van Christus is ek dankbaar omdat ek weet dat ek waarlik geseënd is, want daar is hoop vir ons wat geloof het in Christus. Die Here gee ons hoop en dit is waarlik tot troos. Dankie, Here, dat U my getroos het toe ek droefheid in my lewe ervaar het met die dood van my moeder. Dankie vir die godvresende mense wat U my gegee het om my fisies te versorg in my tyd van smart. Dankie vir die troos wat U Heilige Gees in my siel gegee het. Ja, Here, ek kan as gelowige sien dat ek geseënd is as ek treur. Ek het U lief, Here, want U gee vir my om.

Daar is geen spesiale formule, woorde of metode nie. Al wat belangrik is, is om God se Woord te oordink. Laat hulle toe om jou siel te deurdrenk. Wanneer hulle in jou lewe indring, sal God tot jou diepste wese spreek.

Deur dit aan te hou doen, word ons in alles meer soos Christus. Ons kan nie net versoekings weerstaan nie, maar ons bewys meer liefde en ons tree meer soos Jesus op, op elke gebied van ons lewens. Om God te ken, is die SLEUTEL tot 'n oorwinningslewe in Christus.

\*Ek het aanbeveel dat jy die laaste afdeling in jou gebedslys verdeel. Dit is bedoel vir oordenking. Skryf elke dag wat jy jou Bybel oopmaak, die datum in, en skryf ten minste een waarheid neer waaroor die Here met jou praat. Soms is dit makliker om na te dink oor die Woord as jy jou gedagtes neerskryf; dit mag ook goed wees om later terug te gaan en die kosbare dinge wat die Here vir jou gesê het, weer te lees. Dit is 'n baie intieme en kosbare oomblik tussen jou en jou Meester.

\*Ek wil jou uitdaag om jou te verbind om vir een week elke dag ten minste vyftien minute met die Vader deur te bring. Skryf as dit moontlik is een ding neer wat die Here vir jou gesê het. As 'n persoon nie kan lees nie, moet hy iemand probeer kry wat miskien vir hom net een vers per dag sal lees vir die week. Kyk dan wat gebeur as die Woord van God elke dag toegelaat word om die hart binne te dring.

\*Kom ons lees almal die hoofstuk waarmee ons hier begin het klaar. Jy hoef nie te jaag om 'n hoofstuk per dag te lees nie. As jy 'n hoofstuk klaar gelees het, gaan aan met die volgende, en die volgende. Kom ons kom volgende week terug om moontlike belewenisse terwyl ons Gods Woord oordink, met mekaar te de el.

## BEGIN 'N NUWE LEWE IN CHRISTUS

Deur  
Christy A. Brawner

### **“Dryf die Vrees uit Vissermanne uit” – Les 4** **Matteus 4-8**

**“Hy sê vir hulle: ‘Waarom is julle bang, kleingelowiges?’ Daarna het Hy opgestaan en die wind en die see hard aangespreek, en dit het doodstil geword.” Matteus 8:26**

*\*As leier moet jy onthou om vir die groepslede te vra of hulle elke dag hul Bybels kon lees en kon bid. Gee elkeen die geleentheid om iets te deel van hul belewenisse. Bemoedig hulle om aan te hou.*

*\*Dit is, as gevolg van die aard van hierdie week se studie, verder belangrik om gebed van intersessie aan die begin van die sessie te hê in plaas van aan die einde.*

#### **Hersiening**

1. Die profeet Jesaja het gesê dat Jesus Immanuel genoem sal word, wat beteken: “God \_\_\_\_\_.”
2. Op die Olyfberg, toe Jesus vir Sy dissipels vertel het van Sy wederkoms, het Hy hulle gewaarsku om versigtig te wees dat hulle nie deur vals profete of mense wat sê dat hulle die Christus is, \_\_\_\_\_ word, selfs al kán hulle wonderwerke doen.
3. Jesus het gesê wanneer Hy weer kom, sal almal Hom (met groot krag en majesteit) sien kom met die \_\_\_\_\_.
4. Jesus het gesê net die \_\_\_\_\_ weet wanneer Hy weer sal kom na die aarde toe.

5. Johannes die Doper het baie mense gedoop in die woestyn; dié wat hulle bekeer het van hul \_\_\_\_\_.
6. Voordat Jesus opgevaar het na die hemel, het Hy beveel dat al Sy dissipels \_\_\_\_\_ moes word.
7. Johannes het gesê dat Een sou kom wat die mense van die aarde sou skei, en dat dié wat Hom verwerp, verdoem is tot 'n onuitblusbare \_\_\_\_\_.
8. Met sy eerste twee versoekings van Jesus het Satan Hom probeer oorhaal om “toertjies” te doen om te bewys dat Hy \_\_\_\_\_ is.
9. Met die derde versoeking wou Satan hê Jesus moes voor hom neerval en hom \_\_\_\_\_.
10. Jesus het die duiwel drie maal geantwoord deur die \_\_\_\_\_ van \_\_\_\_\_ aan te haal.
11. As ons God beter wil ken, moet ons elke dag \_\_\_\_\_ met Hom deurbring.
12. Watter twee nature in jou is en konflik met mekaar? Die \_\_\_\_\_ en die \_\_\_\_\_.
13. As ons versoekings wil weerstaan, is dit noodsaaklik om tyd ALLEEN met \_\_\_\_\_ deur te bring, elke dag.
14. As ek meer soos Christus wil wees, is dit nodig om tyd ALLEEN met Hom \_\_\_\_\_.

Toe Jesus terugkom van die woestyn af het Hy met Sy openbare optrede begin. Hy het Hom in die gebied van die See van Galilea gevestig, in Kapernaum. Hy het hier dieselfde boodskap gebring as wat Johannes die Doper gebring het: “Bekeer julle, want die koninkryk van die hemel het naby gekom.”

Die eerste twee dissipels wat Jesus geroep het, was Simon Petrus en Andreas. Hierdie twee broers was saam besig om met hul nette vis te probeer vang. Jesus het hulle geroep: “Kom hier! Kom saam met My, en Ek sal julle vissers van mense maak.”

Van hier af het Hy gegaan totdat Hy by 'n skuit gekom het waar 'n man en sy twee seuns besig was om hul nette reg te maak. Hy het die twee seuns geroep om Hom te volg. Hulle was Jakobus en Johannes, en hul vader was Sebedeus.

Jesus het deur die hele gebied gegaan, die mense in die Sinagoges geleer, die Evangelie van die koninkryk verkondig en elke soort siekte en kwaal genees. Hy het so bekend geword dat selfs die mense van die naburige Sirië na Hom gekom het vir genesing.

Toe Jesus sien dat al die mense Hom volg, het Hy met Sy dissipels teen 'n sekere berg opgegaan. Daar het Hy gaan sit en Sy dissipels baie dinge geleer oor die koninkryk van God.

Die mense het na Jesus geluister en was verstom oor die gesag waarmee Hy onderrig het. Niemand het enigeen ooit so hoor praat in sy Sinagoge nie!

Toe Jesus van die berg afkom, het daar reeds 'n skare mense gewag om Hom te volg waar Hy ookal heen sou gaan. Tussen hulle was daar 'n melaatse man wat vir Jesus gevra het of Hy hom nie asseblief sou reinig nie. Hy is onmiddellik genees. Nog 'n man, 'n Romeinse soldaat, het Jesus gevra om sy verlamde slaaf wat tuis gelê het, te genees. Jesus het die slaaf genees.

Jesus het na Simon Petrus se huis gegaan omdat Petrus se skoonmoeder koors gehad het en baie siek was. Jesus het haar hand aangeraak en die koors het haar verlaat. Sy het toe opgestaan en almal in die huis bedien.

Jesus het toe die aand daar oorgebly, al die mense genees en baie duiwels uitgedryf. Toe Hy egter die massa om die plek sien, het Hy vir Sy dissipels gesê om saam met Hom te kom na die oorkant van die See van Galilea.

Dit was reeds laat nag toe hulle in die skuit klim om oorkant toe te vaar. Toe hulle in die middel van die see was, het daar skielik 'n storm opgekome en die golwe het bo-oor die skuit geslaan. Die

dissipels, baie van hulle was vissermanne, het besef dat hulle in gevaar verkeer en baie bang geword. Jesus het egter aan die slaap geraak en nie eens wakker geword nie!

Die dissipels was vreesbevange en het Jesus wakker gemaak. “Here, red ons! Ons vergaan!” Hy sê toe vir hulle: “Waarom is julle bang, kleingelowiges?” Toe staan Hy op en het die wind en die see hard aangespreek. Dit het dadelik doodstil geword. Die dissipels was verwonderd. “Watter soort mens is Hy dat selfs die see Hom gehoorsaam?”

### Mondelinge Vrae

1. Watter boodskap het Jesus verkondig?
2. Gee die name van twee van Jesus se eerste dissipels.
3. Wat was hulle beroep?
4. Hoekom wou die mense Jesus so graag sien?
5. Hoekom was Jesus se dissipels so beïndruk met die manier waarop Hy hulle op die berg geleer het?
6. Nadat Jesus afgekom het van die berg, het Hy ’n baie siek man genees. Wat was die man se probleem?
7. Daarna het Hy die slaaf van ’n Romeinse soldaat genees. Wat was verkeerd met die slaaf?
8. Watter familielid van Petrus het Jesus genees?
9. Hoekom wou Jesus oorvaar na die oorkant van die See van Galilea?
10. Wat het Jesus in die skuit gedoen?
11. Waarom was die dissipels so bang?
12. Hoekom het Jesus hulle bestraf?
13. Wat was die dissipels se reaksie op Jesus se vermoë om die storm stil te maak?

## Geestelike Waarhede – Les 4

### Matteus 4-8

1. Jesus roep ons ALMAL om “vissers van mense” te wees. Een van die bevels wat Jesus ons gee, is om met mense in elke land, stad en buurt in die wêreld die vryheid wat ons in Christus het, te deel. Dit was Sy laaste woorde aan Sy volgelinge voor Hy opgevaar het na die hemel. Die laaste week van hierdie studie gaan ons leer hoe om ons geloof in Jesus duidelik te deel. Baie van ons is egter te bang om self met iemand anders te begin praat oor Christus. Ons kry gedagtes soos: “Wie is ek nou eintlik? Ek het so baie tekortkominge. Hoe sal ek iemand ooit kan oortuig om Christus te volg? En selfs al kon ek, ek bly maar in een uithoek van die aarde. Hoe kan Christus van ons verwag om ’n verskil te maak in ander dele van die wêreld?”

Die Bybel leer ons dat, selfs al was ons die mees dramatiese en die beste spreker wat ooit gelewe het, ons nooit ’n persoon sal kan oorreed om Christus te volg nie. Toe ons ons harte vir Christus gegee het, was dit nie ’n mens wat ons geraak het nie, maar die teenwoordigheid van die Heilige Gees van God wat ons beweeg het tot bekering. Johannes 16:8 sê: “En wanneer Hy kom, sal Hy bewys dat die wêreld skuldig is aan sonde, en dat die reg aan my kant is, en dat die oordeel al gekom het.”

Ons rol as vissers van mense, is om die net van ons lewe in te gooi en al die vis wat die Heilige Gees in ons rigting stuur, in te bring.

Een van die eerste stappe om ons geloof in Christus met ander te deel, is om te kan vertel wat Christus in ons lewens gedoen het. Dit word ’n “getuigenis” genoem. “Getuigenis” word in ’n hof gelewer. Getuies lewer getuigenis oor die dinge

wat hulle wéét die waarheid is, dinge wat hulle eerstehands gesien het. Mense mag sê dat jy mal is, 'n ongeloofwaardige getuie, maar hulle kan iets wat jy sê beleeft het, nie ontken nie. Hier is 'n oefening wat ons nou saam kan doen.

- Laat elkeen terugdink hoe sy lewe was voor hy Christus geken het.
- Dink dan hoe jy die eerste keer van Christus gehoor het.
- Dink aan die oomblik toe die Heilige Gees in jou hart begin werk het, en jy geweet het dat Jesus *God* is en dat jy Hom in jou lewe nodig het.
- Dink aan jou besluit om jou lewe vir Christus te gee.
- Dink laastens aan die verskil wat Christus in jou lewe gemaak het.
- Nadat julle dit gedoen het, laat elkeen om die beurt sy getuie met die groep deel. **DIT IS BELANGRIK DAT DIT NIE LANGER MOET WEES AS 3 MINUTE NIE!**

\*Dit is nou ook tyd om mekaar onderling in ons eie stiltetyd as groep te begin ondersteun deur gebed vir mense wat die Here op groepslede se harte gelê het, wat Hom nog nie aangeneem het nie. Daar is dalk iemand by die werk of die skool; dalk naby familielede. Bid saam vir hierdie mense. Elke groepslid moet hierdie name by hul gebedslys voeg. Dit is 'n groepsoging om almal by Christus uit te bring.

\*Ons moet nie die mense vergeet wat ver van ons af bly nie. Dit is ons verantwoordelikheid om vir hulle ook te bid.

\*'n Idee vir die leier – Jy en jou leraar weet dalk van 'n sendeling in 'n ander deel van die land, of selfs 'n ander land, vir wie julle as groep kan begin bid. Bid vir hom, vir sy gesin en die mense wat deur hulle bedien word. Doen dit elke week wanneer u as Bybelstudiegroep vir ander mense in gebed intersessie doen. Laat

een van die groepslede vir die sendeling skryf om hom te vra of hy spesiale gebedsversoeke het. Kyk of daar dalk maniere is waarop julle groep kan help om die Goeie Nuus van Jesus te deel met mense in verafgeleë plekke dwarsoor die wêreld, en bid saam daarvoor. Bespreek eers hierdie aspek voor julle voortgaan na die volgende geestelike waarheid.

2. Jesus het die dissipels nie tereggewys omdat hulle Hom wakker gemaak het nie, maar omdat hulle vol vrees was. Die dissipels het na die storm gekyk. Hulle het storms geken en het geweet hierdie een was groot. Hulle was nog nie bekend met die krag van God in hul lewens nie. Hulle het nog nie besef dat God groter is as enige storm in hulle lewens nie, en dat Hy by hulle in die skuit was!

Ek het 'n 18 maande-oue dogtertjie wat die wêreld om haar begin ontdek. Sy hardloop in die huis rond, maak kaste oop, pluk die potte en panne uit, en alles wat sy in haar handjies kry... Een aand het ons by vriende gaan eet. Sy het op die eetkamervloer sit en speel toe hulle groot swart hond ingestap kom. My dogtertjie het dadelik na my toe gehardloop en geskree: "Mamma!" Toe ek haar optel, het haar spiertjies dadelik ontspan. Hoekom? Sy het geweet ek het haar lief en sy het my vertou om haar te beskerm. Sy was binne 'n paar minute heeltemal gerus en het selfs met haar handjie aan die hond geraak.

Van die oomblik af wat ons ons harte aan God gegee het, is ons Sy kinders. Hy is ons Beskermer. Hy het ons lief en ons moet in ons vrees onmiddellik na Hom toe hardloop. In Sy arms dryf Hy die vrees uit. Daar is geen vrees as ons elke dag onder die vleuels van gehoorsaamheid aan Jesus Christus leef nie.

In die Ou Testament was daar 'n man met die naam Dawid. Hy het baie benoude, moeilike oomblikke beleef omdat 'n man,

Koning Saul, hom probeer doodmaak het. Soos Dawid meer van God geleer het, het hy algaande nader aan Hom beweeg. Hy het Psalms geskryf. Dit was gedigte, deur God geïnspireer, om mense meer van God te leer. Daar is 150 Psalms in die Ou Testament, maar nie almal is deur Dawid geskryf nie. Hy het verskeie Psalms geskryf oor vrees, maar ek wil hê ons moet hierdie week Psalm 27 lees en daaroor nadink. Ingeval jy nie 'n volledige Bybel het nie, het ek die Psalm volledig ingesluit by die notas. Vra die Here om jou te leer om al jou vrese neer te lê en in Sy arms van liefde en veiligheid te bly.

\*Sluit hierdie week met gebed, maar laat die groep in pare verdeel, verkieslik van dieselfde geslag. Laat hulle met mekaar praat oor dinge in hulle lewens wat hulle vrees en laat hulle dan vir mekaar bid deur hul maat voor die Here te noem. Dan moet hulle Hom vra om die vrees weg te neem en dit te vervang met geloof in Hom. Sê vir Hom dat jy begeer om al jou vertroue in Hom te stel, selfs vir dié dinge waarvoor jy so bang is.

## **Psalm 27**

*Die Here is my lig en my redder*

Die Here is my lig en my redder,  
vir wie sou ek bang wees?  
Die Here is my toevlug,  
vir wie sou ek vrees?

<sup>2</sup>As misdadigers op my afstorm  
om my dood te maak,  
my teëstanders en my vyande,  
dan is dit juis hulle wat struikel en val.

<sup>3</sup>Al sou 'n leër teen my stelling inneem,  
sal ek nie bang word nie.  
Selfs al sou die aanval op my begin,  
sal ek nog steeds vertroue hê.

<sup>4</sup>Net een ding het ek van die Here gevra  
en dit sal ek najaag:  
dat ek my lewe lank  
in sy huis mag woon  
om sy goedheid te belewe  
en daaroor na te dink in sy tempel.

<sup>5</sup>Op die dag van gevaar sal die Here  
my wegsteek in sy huis,  
my veilig laat skuil in sy woonplek,  
my hoog op 'n rots laat staan;

<sup>6</sup>ek sal in sy woonplek  
onder trompetgeklank  
my offers bring,  
ek sal 'n lied sing,  
ek sal sing tot eer van die Here  
terwyl ek neerkyk  
op die vyande rondom my.

- <sup>7</sup>Luister tog na my, Here, as ek roep;  
wees my genadig  
en verhoor my gebed.
- <sup>8</sup>Ek onthou wat U gesê het:  
“Julle moet My kom dien!”  
Ek is hier om U te dien, Here.
- <sup>9</sup>Moet U tog nie vir my verberg nie,  
moet my tog nie wegstuur  
terwyl U toornig is nie,  
want U was nog altyd my hulp.  
Moet my tog nie verstoot en verlaat nie,  
want U alleen is die God wat my red.
- <sup>10</sup>Al sou my vader en my moeder  
my verlaat,  
die Here sal my onder sy sorg neem.
- <sup>11</sup>Leer my u wil, Here,  
en lei my op ’n gelyk pad  
sodat my vyande nie hulle sin kry nie.
- <sup>12</sup>Moet my tog nie oorgee aan die venyn  
van my teëstanders nie,  
want daar staan valse getuies teenoor my  
en hulle blaas geweld teen my aan.
- <sup>13</sup>As ek darem nie geglo het dat ek  
die goedheid van die Here sal sien  
in die land van die lewendes  
nie...!
- <sup>14</sup>Vertrou op die Here!  
Wees sterk en hou goeie moed!  
Ja, vertrou op die Here!

## BEGIN ’N NUWE LEWE IN CHRISTUS

Deur  
Christy A. Brawner

### **“Liefde – die Betekenis van Christus se Aardse Bediening” – Les 5** **Matteus 8-10**

**“Toe Hy die menigtes sien, het Hy hulle innig jammer gekry,  
want hulle was moeg en hulpeloos soos skape wat nie ’n wagter  
het nie.” Matteus 9:36**

*\*Voor jy die les begin, vra asseblief hoeveel groepslede hul stiltetyd  
gehou het. Dit is belangrik om met liefde te vra en nie met kritiek  
nie, terwyl julle mekaar bemoedig om elke dag in God se Woord te  
bly. Nooi hulle om aan te hou om Matteus te lees, tot die einde van  
die boek. Vind ook uit of hulle gebed het vir die mense wat Christus  
nodig het. Kyk of enigeen die geleentheid gehad het om sy getuienis  
gedurende die week met iemand te deel.*

#### Hersiening

1. Die profeet Jesaja het gesê dat Jesus Immanuel genoem sal word. Dit beteken: “God \_\_\_\_\_.”
2. Jesus het gesê wanneer Hy terugkom, sal almal Hom sien kom op die \_\_\_\_\_, met groot krag en majesteit.
3. Jesus het gesê niemand weet wanneer Hy weer sal kom nie, net die \_\_\_\_\_.
4. Johannes die Doper het in die woestyn baie mense wat hulle bekeer het van hulle \_\_\_\_\_ gedoop.
5. Johannes het gesê dat daar Een kom wat die mense van die aarde sal skei, en dat dié wat Hom verwerp, verdoem is tot ’n

- onuitblusbare \_\_\_\_\_.
6. Jesus het die duiwel drie maal geantwoord deur die \_\_\_\_\_ van God aan te haal.
  7. As ons nader aan God wil beweeg, moet ons elke dag tyd alleen met Hom \_\_\_\_\_.
  8. Jesus het ons geroep tot “\_\_\_\_\_ van mense.”
  9. Wat het Jesus gedoen terwyl die storm op die see gewoed het en hulle in die skuit was?
  10. Hoekom was die dissipels bang?
  11. Jesus het Sy dissipels tereggewys omdat hulle \_\_\_\_\_ was en Hom nie vertrou het nie.
  12. Die Bybel leer vir ons as ons onder die vleuels van Christus se beskerming leef, hoef ons nie te \_\_\_\_\_ nie.

Nadat hulle die See van Galilea oorgevaar het gedurende die verskriklike storm, het Jesus en Sy dissipels aan die oorkant aangekom. Daar het hulle twee manne teëgekom wat van die duiwel besete was. Hulle was gevaarlik en het tussen die grafte gewoon. Een van hulle het skielik vir Jesus geskree: “Wat het U met ons te doen, Seun van God? Het U hierheen gekom om ons voor die tyd te pynig?”

’n Ent verder, naby die see, het ’n groep varkwagters ’n trop varke opgepas. Die duiwels het Jesus gesmeek om hulle toe te laat om in die varke in te gaan as Hy hulle uit die mans uitdryf. Jesus het gesê: “Gaan!” Toe die duiwels in die varke invaar, het die hele trop op loop gesit, teen die berghang af, die see in en daar het hulle versuip.

Die wagters het dorp toe gehardloop om almal te vertel wat gebeur het. Die dorpenaars het Jesus ernstig versoek om die gebied te verlaat. Jesus het na Sy eie dorp toe teruggevaar.

In Galilea het hulle ’n verlamde man na Hom toe gebring. Jesus het sy verlamming genees en sy sondes vergewe. Toe die mense dít

sien, het hulle God met eerbiedige vrees geprys. Maar die Fariseërs het Hom beskuldig dat Hy godslasterlike dinge sê.

Jesus het daarvandaan verder gegaan. Toe kom Hy by ’n tollenaar met die naam Matteus. Jesus het Matteus geroep om Hom te volg en hy het dadelik opgestaan het Hom gevolg. Jesus het by Matteus gaan eet. Daar was ook ander tollenaars en mense van ‘slegte’ reputasie by die ete. Toe die Fariseërs sien saam met wie Jesus eet, het hulle vir Sy dissipels gevra waarom Hy dit doen. Jesus het hulle geantwoord: “Ek verwag barmhartigheid, nie offers nie.”

Van hier af het Jesus begin uitreik na mense in alle vlakke van die samelewing. Daar was ’n raadslid van die Sinagoge wie se dogtertjie dood was. Hy het voor Jesus kom kniel en gevra dat Hy haar weer moes lewend maak. Jesus het saam met die man gegaan en sy dogter lewend aan hom teruggegee.

Hy het twee blinde mans wat Hom gesmeek het om te kan sien, se oë geopen. Hy het duiwels uit ’n stom man gedryf en hy kon praat.

Jesus het die groot nood onder die mense gesien en Hy het hulle innig jammer gekry. Die mense was soos skape sonder ’n herder. Hy het vir Sy dissipels gesê: “Die oes is groot, maar die arbeiders min. Bid dan die Here aan wie die oes behoort, om arbeiders uit te stuur vir Sy oes.”

Toe het Hy Sy dissipels uitgestuur, die hele Israel in. Hy het hulle mag gegee om in die mense se behoeftes te voorsien; hulle doel om Sy liefde te bewys en met mense te deel. Hy het vir hulle spesifieke opdragte gegee: soek die mense wat die Goeie Nuus van Christus wil hoor. Hy het gesê dat hulle die vrede van God in die huis van so ’n persoon sal laat. Hy het hulle egter gewaarsku dat baie mense hulle en hul woorde sou verwerp.

Hy het vir hulle gesê: “Onthou: Ek stuur julle soos skape tussen wolwe in. Wees dus versigtig soos slange en opreg soos duiwe.” Hy het vir hulle gesê om nie te bekommer oor finansiële behoeftes nie, want die Vader weet selfs hoeveel hare op hulle koppe is, en vir Hom

wat in beheer is van alles, is ons baie werd.

Voor Hy hulle uitgestuur het, het Jesus afgesluit deur te sê: “Wie aan een van hierdie geringstes net ’n beker koue water gee omdat hy my dissipel is, sál sy beloning kry. Dit verseker Ek julle.”

### Mondelinge Vrae

1. Wie het Jesus teëgekome nadat Hy en Sy dissipels aan die oorkant van die See van Galilea gekom het ná die stormagtige bootreis?
2. Wat was verkeerd met hierdie mense?
3. Wat het Jesus vir hulle gedoen?
4. Hoekom het die trop varke in die see gestort?
5. Hoekom het die dorpenaars Jesus versoek om hulle gebied te verlaat?
6. Wat het Jesus vir die verlamde man gedoen?
7. Hoekom het die Fariseërs Jesus van godslastering beskuldig?
8. Wat het Hy hulle geantwoord?
9. Waarom het die Fariseërs Jesus gekritiseer oor die mense saam met wie Hy geëet het?
10. Wat het Hy hulle geantwoord?
11. Wat het Jesus vir die raadslid se dogter gedoen?
12. Wat het Hy gedoen vir die blinde mans?
13. Hoe het Jesus die stom man genees? Wat was verkeerd met hom?
14. Waarvoor het Jesus Sy dissipels uitgestuur?
15. Jesus het vir Sy dissipels gesê om so versigtig soos \_\_\_\_\_ en so opreg soos \_\_\_\_\_ te wees.
16. Waaroor moet hulle hulle nie bekommer nie?
17. Hy het gesê dat God selfs weet hoeveel \_\_\_\_\_ daar op ons koppe is.

18. Jesus het vir hulle gesê dat daar een spesifieke groep mense is wat vir Hom baie saak maak, en as iemand vir hulle selfs so min as ’n glas water gee, sal hy sekerlik nie sy beloning verloor nie. Na watter groep mense het Hy verwys?

## Geestelike Waarhede – Les 5

### Matteus 8-10

1. Jesus gee vir almal om. Hy gee om vir die duiwel besetenes, die siekes, armes, rykes en veral vir Sy kinders. Almal is kosbaar en waardevol vir die koninkryk van God!!!
2. Mense gee nie altyd om vir ander mense nie. In die geval van die duiwel-besete mans was die dorpsmense so ontsteld oor die varke dat hulle Jesus nie meer in hulle gebied wou hê nie. Dit het glad nie vir hulle saak gemaak dat Jesus die mans gehelp het nie. Hulle was waarskynlik besorg oor die finansiële verlies wat gely is. Dit is baie maklik om geld meer werd te ag as mense. Ongelukkig trap ons feiltik almal in hierdie strik. “Geldgierigheid is ’n wortel van allerlei kwaad. Party het geld nagejaag en toe van die geloof afgedwaal; daardeur het hulle hulleself baie ellende op die hals gehaal.” (1 Timoteus 6:10). Jy mag dalk ook Jesus se woorde in Matteus 6:19-21 onthou: <sup>19</sup>“Moenie vir julle skatte op aarde bymekaar maak waar mot en roes dit verniel en waar diewe inbreek en dit steel nie. <sup>20</sup>Maak vir julle skatte in die hemel bymekaar, waar mot en roes dit nie verniel nie en waar diewe nie inbreek en dit steel nie. <sup>21</sup>Waar jou skat is, daar sal jou hart ook wees.” Geld is magtig. Dit kan óns beheer, of ons kan dit vir die Here gee en Hy kan ons beheer.
  - Dink ’n bietjie: hoe spandeer ek my geld elke week? Dit is ’n goeie plan om dit neer te skryf.
  - Vra jouself die vraag af: eer ek Jesus met die manier waarop ek my geld spandeer?
  - Koop of doen ek dinge wat God oneer aandoen? Maak ek mense seer deur die manier waarop ek my geld bestee? Help ek ander met die manier waarop ek my geld bestee?

God vra in die Ou Testament dat almal 10% van wat hy het vir Hom moet gee. Die Nuwe Testament sê ons moet ons lewens en alles wat ons het vir Hom gee. Ons het egter tradisioneel die Ou Testament=iese wet gevolg en 10% van ons finansiële inkomste gebring vir die werk van die Here of die kerk. Dit word ’n tiende genoem. Begin nou bid: hoeveel van jou geld wil die Here hê moet jy vir Sy werk gee? Die Bybel leer dat die Here diegene seën wat bydra tot die groei van Sy koninkryk. Die Bybel leer verder dat Hy in al ons behoeftes sal voorsien. Dalk dink jy: “Maar verstaan die Here nie hoe arm ek is nie?” of “God verstaan nie hoeveel skuld ek aangegaan het nie.” Jesus is ook in ’n arm aardse gesin gebore. Hy verstaan armoede, maar Hy vra ons om almal getrou te wees in gehoorsaamheid aan alles wat Hy ons vra om te doen. Vra die Here hoe Hy wil hê jy deel moet hê aan die finansiële ondersteuning van Sy werk.

3. Om ’n volgeling van Christus te wees, beteken om Sy voorbeeld te volg en ander lief te hê soos Hy hulle het. Dit is waar dat ons nie soos Jesus mense kan genees nie, maar Jesus genees nog steeds mense. Ons moet getrou wees in gebede vir siekes. Ons moet hulle bystaan en hulle hande vashou in hul oomblikke van pyn. Ons moet vir hulle vertel van Jesus se liefde vir hulle. Ons moet bid vir duiwel-besetenes. Jesus dryf steeds dwarsoor die wêreld duiwels uit deur die gebede van Sy kinders. Ons moet vir hulpbehoewendes bid en hulle help. Ons moet alles doen wat ons moontlik kan om te help met hul fisiese nood, maar veral vir hulle vertel van die liefde van Christus wat hulle harte kan verander. Jesus het Sy dissipels beveel om hierdie dinge te doen, maar Hy het ’n spesiale beloning belowe aan enigiemand wat Sy kinders help.
4. Om party mense lief te hê, is baie moeilik, maar die Here

begeer dat ons genade moet bewys. In Jesus se tyd was tollenaars om 'n goeie rede gehate mense: hulle het geld ingevorder vir 'n korrupte regering. Die meeste van hulle het dan nóg meer van die mense gevra en die eksta geld in hul eie sakke gesteek. Om iemand lief te hê wat jou besteel het, is nie so maklik nie, veral as die persoon nie eens jammer is oor wat hy gedoen het nie! Jesus leer ons egter dat ons, as Sy volgelinge, geen reg het om hierdie mense te veroordeel nie, selfs al is wat hulle doen heeltemal verkeerd. Dit is ons plig om vir hulle te bid, hulle lief te hê en vir hulle die waarheid te wys van God se vergifnis. As hulle hulle bekeer van hul sondes, sal hulle God se vergifnis verkry. Die Bybel sê ons is almal sondaars wat straf verdien. Die Bybel sê ook ons het vergifnis en genade ontvang, daarom moet ons ook vergifnis en genade bewys, selfs al sou dit 'n onmoontlike taak wees sonder die krag van God in ons lewens.

5. Die wêreld se nood is so groot dat ons dit nie alleen kan doen nie. Daar is miljoene mense wat nog nooit die liefde van Christus ervaar het nie. Daar is miljoene wat nog nooit enige liefde ervaar het nie. Daar is miljoene mense wat, as iemand net vir hulle sal wys hóé, hulle lewens vir Jesus sal gee en Sy liefde sal ervaar. Ons moet alles in ons vermoë doen, maar ons moet ook bid dat God ander sal roep om te help sodat meer mense by die plek sal uitkom waar hulle God se liefde kan ken.
6. Julle kan jul liefde vir God en mekaar wys deur julle tiende na die gemeente te bring vir die werk van die Here. Die Here gebruik die plaaslike gemeente om in mense se geestelike, sowel as emosionele en fisiese behoeftes te voorsien. God gebruik julle tiendes om die kerk te help om haar werk te doen.

### Mondelinge Vrae

1. Op watter wyses kan ek, in my omgewing en binne my omstandighede, God se liefde met ander deel?
2. Wat is die mense om my se grootste nood? Wat veroorsaak die grootste lyding vir die mense waar ek woon?
3. Hoe kan ek uitreik na die mense se seer?
4. Hoe kan ek God se liefde bewys, veral aan Sy kinders?
5. Op watter manier ag ek geld hoër as die mense in my lewe?
6. Eer ek die Here met my geld?
7. Hoe kan ek die genade wat God aan my bewys het, deel met die mense om my?

*\*Hier is nóg 'n goeie geleentheid om te praat oor die ondersteuning van 'n sendeling in 'n ander wêrelddeel, en om vir mense van 'n land wat nog nie die Woord van God gehoor het nie, te bid.*

## BEGIN 'N NUWE LEWE IN CHRISTUS

Deur  
Christy A. Brawner

### **“Verraad en Vergifnis” – Les 6** **Matteus 21 – 27:10**

**“Maar as ons ons sondes bely – Hy is getrou en regverdig, Hy vergewe ons ons sondes en reinig ons van alle ongeregtigheid.”**  
**1 Johannes 1:9**

#### Hersiening

1. Die profeet Jesaja het gesê Jesus sou Immanuel genoem word. Dit beteken: “God \_\_\_\_\_.”
2. Jesus het gesê niemand weet wanneer Hy weer kom na die aarde nie, net die \_\_\_\_\_.
3. Johannes die Doper het in die woestyn baie mense gedoop wat hulle bekeer het van hulle \_\_\_\_\_.
4. Jesus het die duiwel drie maal uit die \_\_\_\_\_ van God geantwoord.
5. As ons nader aan Jesus wil kom, moet ons tyd alleen met Hom \_\_\_\_\_.
6. Jesus het ons geroep tot “\_\_\_\_\_ van mense.”
7. Jesus het liefde aan alles mense bewys deur hulle siektes te \_\_\_\_\_.
8. Jesus het die mense innig jammer gekry omdat Hy hulle groot \_\_\_\_\_ gesien het.
9. Jesus het Sy volgelingen gestuur na alle mense, maar hulle

gewaarsku om so versigtig soos \_\_\_\_\_ en so opreg soos \_\_\_\_\_ te wees.

10. Jesus het gesê Hy weet selfs hoeveel \_\_\_\_\_ op ons kop is.
11. Hy het gesê dat iemand wat vir Sy dissipels selfs so min as 'n glas koue water gee, nie hulle \_\_\_\_\_ sal verloor nie.
12. Jesus het gedurende die storm vir Sy dissipels in die skuit gesê om nie te \_\_\_\_\_ nie.

Jesus het baie mense in Galilea geleer, vir hulle gepreek en hulle gesond gemaak, maar steeds het baie Sy Woord verwerp. Hy het vir Sy dissipels verduidelik dat dit alles volgens God se wil was omdat Hy hierdie dinge vir slim en geleerde mense verberg het en dit aan eenvoudiges bekend gemaak het.

Die tyd waarop Jesus Sy dissipels voorberei het, het aangebreek. Dit was tyd dat Hy Jerusalem toe gaan om baie dinge te ly onder die priesterhoofde en die familiehoofde, om te sterf en opgewek te word uit die dood.

Sy aankoms in Jerusalem was luisterryk. Die mense het weerskante van die pad gestaan. Hulle het hulle klere en palmtakke op die pad gegooi om 'n mat te maak waarop Jesus kon trap. Terwyl Hy op 'n donkie verby hulle ry, het hulle uitgeroep: “Prys die Seun van Dawid! Loof Hom wat in die Naam van die Here kom! Prys Hom in die hoogste hemel!”

Jesus het 'n hele paar dae in Jerusalem deurgebring en die mense daar onderrig, gepreek en baie mense gesond gemaak. Daar was egter baie konfrontasie en konflik tussen Hom en die Fariseërs en Sadduseërs.

Judas Iskariot, een van Jesus se twaalf dissipels, het na die priesterhoofde gegaan en aangebied om Hom te verrai as hulle hom sou betaal. Hulle het hom dertig silwerstukke aangebied en hy het dit